

ՍԻՐԻԱԿԱՆ ԲՈՒՐՔՈՒԱԶԻԱՅԻ ՀԱՅԿԱԿԱՆ ՀԱՏՎԱԾԻ ԴԻՐՔԵՐԸ ԵՐԿՐԻ
ԷԿՈՆՈՄԻԿԱՅՈՒՄ (1945—60-ական թվականներ)

Ս. Մ. ՄՈՒՐԱԴՅԱՆ

Սիրիայում օտարազգի ձեռնարկատերերն անկախության հենց սկզբից շրջապատված էին ընդհանուր ազգայնականության հետևից, որը թշնամանքով, ապա անբարյացակամ վերաբերմունքով: Դրա պատճառներից էին ինչպես կրոնա-էթնիկական գործոնները, այնպես էլ առևտրի, ֆինանսների ու վաշխառուական բնագավառներում փոքրամասնությունների վերնախավի մասնագիտացումը: Հուլյն վաշխառուի և հայ առևտրականի նկատմամբ հակակրանքը տարածվում էր բոլոր հուլյների և հայերի վրա: Այդ հակակրանքը խորանում էր նաև այն պատճառով, որ ազգային փոքրամասնությունները, հատկապես նրանց ունեոր հատվածը, երկար ժամանակ գտնվում էին գաղութային իշխանությունների հովանավորության տակ: Այս ամենն անտեսանելի, բայց ամուր պատենդով կանգնում էր ազգային փոքրամասնությաննեղի ու բնիկ ազգաբնակչության միջև, իսկ մրցակցությունն ու կրոնական տարբերությունները բաժանում ու հակադրում էին նրանց: Ազգային փոքրամասնությունների մեջ երկրի տնտեսական կյանքում ամենաակտիվ մասնակցությունը ցուցաբերում էին հայերը: Մասնագիտական բարձր որակավորումը և գործարարությունը նրանց հնարավորություն էին տալիս զբաղվելու բժշկությամբ, իրավաբանությամբ, մետաղամշակմամբ, մեքենաների ու հաստոցների վերանորոգմամբ, մի խոսքով, աշխատելու այն բոլոր ոլորտներում, որոնց կարիքը զգացվում էր Սիրիայում¹:

Հյուրընկալության առաջին դրսևորումներից հետո հայերի նկատմամբ վերաբերմունքը գնալով ավելի զուսպ էր դառնում: Այդ տարիներին Սիրիա գաղթող հայերը հաճախ բարձր մասնագիտական որակավորում ունենալով հանդերձ, համաձայն էին կատարելու ցանկացած աշխատանք, թեկուզ ցածր վարձատրությամբ, միայն թե պահպանեին իրենց գոյությունը: Բանն այն է, որ այդ երկրի արյունաբերությունը սկզբնավորման փուլում էր և չէր կարող ապավինել ամբողջ աշխատունակ հայ բնակչության զբաղվածությունը: Սիրիայում հայերից շատերն աշխատում էին որպես որակյալ բանվորներ ու արհեստագործներ, երբեմն էլ ստեղծում իրենց փոքր բիզնեսը²: Տոմարին գրում է, որ «Մերձավոր արևելքում «հայ» հասկացությունը վաղուց ձուլվել է «արհեստագործ» հասկացության հետ, այնպես, ինչպես հրեան վաշխառուի և շերքեզը ոստիկանի հետ»³:

Սիրիայում հայերը հիմնեցին մի շարք մանուֆակտուրաներ, որոնք զբաղվում էին մեծ գորգերի, մետաքսե գործվածքեղենի արտագրությամբ, կաշվի, մորթեղենի վերամշակմամբ, սպիրտի թողարկումով: Հայերի ձեռքում էր գտնվում «ալաշա» գործվածքի արտադրությունը. միայն Հայկազում դրանով զբաղված էր 4 հազար մարդ: Գորգագործությամբ զործնականում զբաղվում էին միայն հայերը: Առևտրով պարապող հայերի մասին Սիրիայում ասում էին, որ «ներանք արվեստի մի աստիճանին հասուցած են առևտուրը»⁴: Հայերը փոքր դեր չեն խաղացել սիրիական էկոնոմիկայի զար-

¹ Robin Feden. Syria and Lebanon 1955, p. 24.

² A. Chahry. Politique of minorities on Proche-Orient Lesraision, 1984 p. 33.

³ S. Tomary. Minorities in the Middle East in "Middle East Yearbook". London, 1979. p. 41.

⁴ Հ. Ն. Թոփուղյան, Հայերի մասնակցությունը Սիրիայի և Լիբանանի ազատագրական շարժումներին, Երևան, 1968, էջ 23:

գացման գործում, մասնավորապես ոսկերչության, ձուլման և կահույքի արտադրության բնագավառներում: Դեռևս Ֆրանսիական մանդատի տարիներին հայերը Սիրիայում կառուցում էին տարբեր ձեռնարկություններ⁵:

1940-ական—1950-ական թվականների սկզբին երկրում գոյություն ունեին հետևյալ հայկական ֆիրմաները. «Անթուան Օհանյան» (հիմնվել էր Հալեպում՝ 1918 թ.)—զբաղվում էր մեքենաների, պահեստամասերի, մեխանիկական արհեստանոցների ու տարրեր արդյունաբերական ձեռնարկությունների համար սարքավորումների ներմուծմամբ ու կոմիսիոն առևտրով⁶: «Խան-գողյան եղբայրներ» (հիմնվել էր 1927 թ.) զբաղվում էր գյուղատնտեսական մեքենաների ու ավտոմեքենաների համար պահեստամասերի ներմուծմամբ և կոմիսիոն առևտրով: Ֆիրման ուներ իր մեխանիկական արհեստանոցները⁷: «Աղար Բեդիկյան» (հիմնվել էր 1920-ական թվականներին)—զբաղվում էր հնաոճ ու ժամանակակից կահույքի արտադրությամբ և առևտրով⁸:

Ծրկորող համաշխարհային պատերազմից հետո Սիրիայում իրագործվեցին լուրջ միջոցառումներ, որոնք հետամտում էին զաղութային անցյալից ժառանգված սոցիալ-տնտեսական հետամնացության հաղթահարումը, անկախ ազգային էկոնոմիկայի ստեղծումը, ազգային արդյունաբերության զարգացումը:

Անկախության տարիներին Սիրիայի բուրժուազիան տնտեսական ակտիվության աճի ու ծավալման աննախադեպ հնարավորություններ ստացավ: 1949 թ. ընդունված օրենքի համաձայն կառավարությունը երաշխավորում էր արդյունաբերական ձեռնարկությունների զարգացմանը տրամադրվող վարկերը, որոնք տրվում էին «Սիրիայի և Լիբանանի բանկի» կողմից: Կառավարությունը հասավ նաև այն բանին, որ իջեցվեցին այդ վարկերի տոկոսները⁹: Բուրժուազիայի շահերից ելնելով, 1950 թ. չեղյալ համարվեց մաքսային ունիան Լիբանանի հետ: Դա սիրիական առևտրականներին հնարավորություն տվեց արտաքին առևտրական գործարքները վարել առանց Լիբանանյան առևտրական բուրժուազիայի միջնորդության¹⁰:

1952—1954 թթ. արգելվեց արտասահմանից գրեթե բոլոր այն ապրանքների ներմուծումը, որոնք հնարավոր էր արտադրել երկրի ներսում: Արգելվեցին 58 անվանումների ապրանքների ներմուծումը, ներառյալ գործվածքեղենը, լուցկին, յուղը, պահածոյացված մրգերը, բանջարեղենը և այլն: Այգապիսով, տեղական բուրժուազիան ազատվեց օտարերկրյա մրցակցությանից:

1952 թ. սեպտեմբերին ընդունվեց դեկրետ, որը բարենպաստ պայմաններ ստեղծեց արդյունաբերության զարգացման, հատկապես նոր ձեռնարկությունների ստեղծման համար: Նոր ստեղծվող ձեռնարկությունները 6 տարի ժամկետով ազատվում էին լիցենզիոն վճարից, մասնակիորեն՝ եկամտահարկից և ռեզերվային ֆոնդ փոխանցվող եկամուտներից զանձվող հարկից¹¹: Այս բոլոր միջոցների շնորհիվ Սիրիայի էկոնոմիկայում տեղի ունեցան էական տեղաշարժեր:

⁵ А. М. Захаров, Социальная структура общества и рабочий класс независимой Сирии (дисс. на сонск. уч. ст. канд. ист. наук, М., 1973, с. 120).

⁶ Quid de l'Orient. Fondée 1937. Pour le commerce l'industrie et les professions libérales dans les pays arabes. Beyrouth 1953, p. 330.

⁷ Նույն տեղում, էջ 331:

⁸ Նույն տեղում, էջ 263:

⁹ أحمد السمان محاضرات في اقتصاد سوريا القاهرة ص ٥

¹⁰ В. В. Вавилов, Социально-экономические преобразования в Сирии (1946—1970), М., 1972, с. 108—109.

¹¹ أحمد السمان ص ٣٤

Հիմնվելով պետության ֆինանսական օգնության վրա, հետպատերազմյան առաջին իսկ տարիներին սիրիական բուրժուազիան նկատելիորեն ընդլայնեց առևտրական գործարքները, ձեռնամուխ եղավ գործող ձեռնարկությունների ընդլայնմանը, ստեղծեց տասնյակ խոշոր և հազարավոր մանր ձեռնարկություններ: Արդյունաբերական ձեռնարկության զարգացումն անկախության տարիներին (գլխավորապես թեթև արդյունաբերության բնագավառում) նպաստեց առևտրական ակտիվության բավականին զգալի զարգացմանը ներքին, որոշ չափով նաև արտաքին, շուկաներում, դրանով իսկ նաև՝ մեծ դրամական միջոցների կուտակմանը գործարար շրջանների ձեռքում: Եթե 1945 թ. երկրում գործում էին միայն 5 համեմատաբար խոշոր առևտրական ընկերություններ՝ 2,5 մլն սիրիական ֆունտ կապիտալով, ապա 1962 թ. դրանց թիվը հասավ 75-ի՝ 95,3 մլն սիրիական ֆունտ կապիտալով¹²:

Մանր և միջին արդյունաբերական ու ակցիոներական ընկերությունների գործունեությանը հայ ձեռնարկատերերը սկսեցին մասնակցել 1940-ական թվականների վերջերից: Այդ ընկերություններում նրանց բաժինը կազմում էր բոլոր կապիտալ ներդրումների 10 %-ը¹³: Որոշ ընկերություններում հայ գործարարների կապիտալները հասնում էին ընդհանուր կապիտալների գրեթե կեսին: Այսպես, օրինակ, «Դյուլակա միության» ունեցած 50 հազար ֆունտ սիրիական ֆունդից 20 հազարը հայերին էր, ուստի նրանց արտադրության քաղաքական ընկերությունում՝ 1200-ից 410-ը և այլն¹⁴: 1953 թ. Սիրիայում կսկիին 23 հայկական, 4 խառը (հայ-արաբական) ընտանեկան ընկերություններ¹⁵ և 157 հայկական անհատական ֆիրմաներ¹⁶:

1950-ական թվականներին 32 հայազգի ձեռնարկատերեր զբաղվում էին արդյունաբերական գործունեությամբ, ունեին խոշոր և միջին ձեռնարկություններ: Տեղին է մեջբերել Սիրիայի նախկին պրեզիդենտ Շյուբրի Քուաթլիի 1957 թ. արած հետևյալ հայտարարությունը. «Մենք հայերին սիրում ենք այն բանի համար, որ նրանք մեր երկրում զարգացրին արհեստներն ու արդյունաբերությունը՝ դրանով իսկ նպաստելով մեր տնտեսական վերելքին»¹⁷: Արևմտյան հետազոտող Ռ. Ֆեդդենն իր հերթին գրում է, որ հայերի գիտելիքներն ու աշխատունակությունը նրանց հնարավորություն էին տալիս աշխատելու բոլոր այն ոլորտներում, որոնց կարիքը զգացվում էր Սիրիայում¹⁸: 1954 թ. Դավիթ Կակաչյանն ու Արթին Շառոյանը հիմնեցին բամբակազտիչ հաստոցներ արտադրող գործարան, որը, ունենալով ընդամենը 15 բանվոր, թողարկում էր ամսական 20 հաստոց: Այդ նույն ժամանակ Ա. Դեմիրճյանը հիմնեց մետաղամշակման գործարան, որն արտադրում էր մեքենաների և տարբեր հաստոցների պահեստամասեր: Հետագայում այդ գործարանը սկսեց արտադրել բամբակազտիչ հաստոցներ¹⁹: Կապալների բնագավառում ամենաերևելի հայ ձեռնարկատերը Ջորջ Միքայելյանն էր²⁰: Նա Հալեպում ուներ բամբակի զտման գործարան և ակցիաներ երկու

¹² В. Вавилов, И. Симантовский, Сирия, М., 1975, с. 40.

¹³ جريدة الرسمية عام ١٩٥٠، الإحصاء ٤٢ عام ١٩٥٩ عدد ٢٧ عام ١٩٦٠
رفعت العلى الماصلاح الاقتصادي في سوريا وما يجب تعرفه عن

¹⁴ նույն տեղում:

¹⁵ Quide d'Orient, p. 365—372.

¹⁶ նույն տեղում, էջ 263—364:

¹⁷ Л. Х. Тер-Мкртчян, Армяне в странах Арабского Востока, М., 1965, с. 34.

¹⁸ R. Fedden, նշվ. աշխ., էջ 240.

¹⁹ السرعات واوطا عصا دمشق ١٩٥٤

²⁰ نعمة زيدات عانفنا العربى بيروت ١٩٥٦

խոշոր ակցիոներական ընկերություններում՝ Լաթաքիայի «Ասֆալտի քաղաքացիական ընկերությունում» և Համայի «Զուգունի ձուլման ընկերությունում»²¹։ Տարիներ շարունակ Ջ. Միքայելյանը Հալեպի առևտրի պալատի անդամ էր²²։

Խոշոր հայ գործարարներից էր Արթուր Խոշմեթյանը, որ մասնագիտական կրթությունը ստացել է Փարիզում, ապա վերադառնալով Դամասկոս՝ հիմնել է ակնոցի արտադրություն և վաճառք, իսկ 1956-ից բացել է մասնագիտացված խանութ²³։ Խոսրով Թուսուզյանը դրամի (վալյուտայի) փոխանակման գործարքները համատեղում էր արդյունաբերական գործունեության հետ։ Զբաղվում էր ձիթապտղի, յուղի, օճառի, տեխնիկական յուղերի արտադրությամբ²⁴։

Արաբական Միացյալ Հանրապետության գոյության ժամանակաշրջանում (1958—1961 թթ.) հայերը, ինչպես Սիրիայում, այնպես էլ Եգիպտոսում, բավականին տուժեցին Նասերի ազգայնացման քաղաքականությունից։ Շարքի մոլուխների կարծիքով, «Թեև ռեֆորմների ժանրությունը թվում էր, դիպել էր բոլոր ազգային փոքրամասնություններին (առկա էր նաև ոչ-պաշտոնական խտրականության փաստը), մեծագույն տանջանքներն ու զրկանքները բաժին ընկան Եգիպտոսում ապրող ղպտիներին և Եգիպտոսում ու Սիրիայում ապրող հայերին, որը, հավանաբար, ըստ իրերի տրամաբանության, ի թիվս այլ պատճառների, ավելի բարձր տնտեսական մակարդակի հետևանք էր»²⁵։ Դժվարացավ ներմուծման հետ կապված գործունեության որոշ տեսակներով զբաղվելը։ Բայց «անչափման ռեժիմի» օրոք (1961 թ. սեպտեմբեր—1962 թ. փետրվար) տեղի ունեցավ պետական սեկտորի և նրա սեփականության կրճատում։ Նասերի կողմից ազգայնացված բանկերն ու բազմաթիվ արդյունաբերական ընկերությունները կրկին վերադարձվեցին մասնավոր տերերին։ Բուրժուազիայի շահերից ելնելով, երկրում որոշ շահով թուլացվեց վալյուտային և մաքսային հսկողությունը։ Բուրժուազիայի պահպանողական խավերը կրկին սկսեցին պետության տնտեսական գործունեությունը կողմնորոշել դեպի մասնավոր նախաձեռնության զարգացումը։

1960 թ. Հալեպի առևտրի պալատում գրանցված էր հայերին պատկանող 34 արդյունաբերական ձեռնարկություն²⁶։ Մինչև 1963 թ. Սիրիայի խոշոր քաղաքներում կար տնային կահույքի պատրաստման 82 մանր ձեռնարկություն, որոնցից 8-ը պատկանում էր հայերին։ Հայ ձեռնարկատերերն ունեին նաև օճառի 3 գործարան, 1 սղոցարան, 2 գորգագործական ձեռնարկություն, հացի փոեր, կաշեգործական արհեստանոցներ և այլն²⁷։ 1962 թ. Սիրիայի խոշորագույն կապալառուների թվում (ընդամենը 40) նշվում են նաև 4 հայերի (Ջ. Միքայելյան, Մ. Դեմիրճյան, Ա. Յաղուբյան և Ն. Յաղուբյան) անունները²⁸։

1960-ական թվականների սկզբին երկրի ապահովագրական ընկերություններից մեկը պատկանում էր հայազգի Ջ. Ալթունյանին, որը միաժամանակ Եգիպտոսի Ազգային ապահովագրական ընկերության գործակալն էր²⁹։

²¹ الجريدة الرسمية عام ١٩٥٩ عدد ٤٧ عام ١٩٦٠

²² Aleppo. Chambre du commerce. Economic bulletin of the Chambre of Commerce of Aleppo. Syria, 1960, 35—55.

²³ Quide Arabe. Pour le commerce l'industrie et les professions liberales and les pays arabes, Beyrouth 1962, p. 351.

²⁴ նույն տեղում։

²⁵ L. Chabry, A. Chabry, նույն տեղում, էջ 68.

²⁶ Aleppo. Chambre du Commerce..., p. 3—5.

²⁷ العرارات الماشتراكية دمشق ١٩٦٥ ص ٥

²⁸ В. Вавилов, И. Симагантовский, նույն տեղում, էջ 48.

²⁹ նույն տեղում, էջ 527.

1965 թ. հունվար-մայիսին Սիրիայի կառավարությունն ընդունեց արդյունաբերական առաջատար ճյուղերի ազգայնացումը վավերացնող մի շարք դեկրետներ: Ընդհանուր առմամբ պետականացվեց 108 արդյունաբերական ձեռնարկություն՝ 230,3 մլն ֆունտ ընդհանուր կապիտալով³⁰, Դրանց թվում 1965 թ. ազգայնացվեցին հայ ձեռնարկատերերի Հովհաննիսյանին և Մասաուջյանին, Նիկողոսյանին, Կ. Շարալյանին, Մանուկյանին, Մ. Գաբրիելյանին, Զ. Միքայելյանին, Մ. Խաչատրյանին և այլոց պատկանող խոշոր ձեռնարկությունները, որոնք զբաղվում էին էլեկտրամարտկոցների արտադրությամբ, կաշվի վերամշակմամբ, կտորեղենի ներկումով, բամբակի զտմամբ, հացահատիկի փոխադրմամբ և այլն³¹:

Քանի որ ուսումնասիրվող ժամանակաշրջանում սիրիահայերի 65 %-ն ապրում էր Հալեպում³², ապա դիտարկենք այդ քաղաքում հայ ձեռնարկատերերի ընդհանուր դիրքը՝ հիմնվելով «Հալեպի Առևտրի պալատի տնտեսական տարեգրքի» վրա: Պարզվում է, որ հալեպահայերն իրենց ձեռքում էին կենտրոնացրել ավտոհավաքակալանների և ավտոտեխսպասարկման կայանների մեծամասնությունը: Այսպես, 1962 թ. Հալեպում գրանցված 14 նմանատիպ ձեռնարկություններից 9-ը պատկանում էր հայերին³³: Ըստ վերոհիշյալ տարեգրքի, 1962 թ. քաղաքի 8 գորգագործական ֆաբրիկաներից 7-ը պատկանում էին հայերին³⁴, քաղաքի միակ մարտկոցների արտադրող գործարանի տեղը նույնպես հայ էր: Հալեպում ալյումինե ամանեղենի արտադրության երկու ձեռնարկությունները, աթոռների ու մետաղե զրասենյակային պիտույքների, սինթետիկ ապրանքների, ռետինե կոշիկների արտադրությունները ևս ամբողջովին հայերի ձեռքում էին³⁵: Ընդհանուր առմամբ 1960-ական թվականներին Հալեպի հայ ձեռնարկատերերին էին պատկանում քաղաքի ֆաբրիկաների ու գործարանների 29,7 %-ը:

Ինչ վերաբերում է մանր և միջակ ձեռնարկատերերին, ապա նրանք զբաղված էին արդյունաբերական գործունեության տարբեր ոլորտներում, ձեռնարկություններ ունեին քիմիական, սննդի, մետաղամշակման արդյունաբերության բնագավառներում (սառնարաններ, պոմպեր, քարհանքների, շինարարական արդյունաբերության սարքավորումներ, հաստոցների պահեստամասեր):

Հայերի դրսևորած ակտիվությունը պակաս չէր նաև առևտրի բնագավառում: Ինչպես նշում է Ա. Հաուրանին, հայերը հաստատուն դիրքեր ունեին երկրի առևտրում և արդյունաբերության տարբեր ոլորտներում³⁶: Անկախությունից առաջինները ևս դարձան գործարար ակտիվության հետագա ծավալման տարիներ: 1951 թ. «Արաբական աշխարհ» հրատարակության մեջ հիշատակված 198 հայկական ֆիրմաներից ու միավորումներից 150-ը զբաղվում էր առևտրով, գործում էին նաև 3 խառը սիրիա-հայկական միավորումներ³⁷: Այդ ֆիրմաներից մի քանիսը համատեղում էին արտադրությունն ու առևտուրը: Առևտրի (ներմուծում և արտահանում) ընդհանուր ծավալում հայերի մասնակցությունը հասնում էր մոտավորապես 25 %-ի³⁸: Որոշ առևտրական հաստատությունների կեսը հայերին էր պատկանում: Հմայակ և Սանոս Սանոսյանների ընտանեկան ֆիրման իրականացնում էր ֆաբրիկաների գործակալի ֆունկցիաները և դրանց պատվերներով ներմուծում բոլոր անհրաժեշտ սար-

³⁰ العرايات الماشتركية ص ٥١ ٥٢ ٥٦

³¹ Quide Arabe..., p. 556.

³² Statistical Abstract of Syria, Damascus, 1955, p. 72—95.

³³ Quide Arabe..., p. 560.

³⁴ Alepo. Chambre du commerce, p. 45.

³⁵ Նույն տեղում:

³⁶ H. Haurani, Minorities in the Arab World, L. Oxford Un-ty Pre., 1917, p. 38.

³⁷ Quide de Orient..., p. 261—274.

³⁸ Alepo. Chambrte de commerce..., p. 45.

քաղաքումները (մեքենաներ, շարժիչներ, պահեստամասեր, գյուղատնտեսական մեքենաներ)³⁹։ «Կրիկորյան և Կ միավորումը» ոչ միայն Սիրիայի, այլև ողջ Մերձավոր Արևելքի տարբեր ֆաբրիկաների գործակալ էր։ Այն արդյունաբերության և գյուղատնտեսության համար ներմուծում էր անհրաժեշտ մեքենաներ ու սարքավորումներ, կարի մեքենաներ, մասնակցում էր գյուղատնտեսական արտադրանքի արտահանմանը։ Ֆիրման, որի շտաբ-կայանը գտնվում էր Դամասկոսում, գործակալություններ ուներ Բեյրութում (Հալեպում, դուատր-բաժանմունք՝ Ամմանում (Հորդանան)⁴⁰։ Կոմիսիոն (միջնորդական) գործունեությանը մասնակցում էին նաև հանգոզյան եղբայրների և Անտուան Օհանյանի ֆիրմաները⁴¹։ Սիրիայում 1951 թ. կարելի էր առանձնացնել մոտ 20 հայկական ֆիրմաներ, որոնք զբաղվում էին միջնորդության, մեծածախ առևտրով, ներմուծման-արտահանման գործարքներով⁴²։ Մնացած միավորումներն ու ֆիրմաները գործում էին ներքին առևտրի ոլորտում⁴³։

1950—1960-ական թվականներին հայ գործարար շրջանների գործունեությունը համեմատելիս ուղադրություն է գրավում այն փաստը, որ պահեստամասերի, էլեկտրական և ռադիոսարքավորումների ու սառնարանների վաճառքով զբաղվող ընկերությունների և ֆիրմաների թիվը 13 միավորով ավելացել էր։ Հագուստի, կոշիկեղենի և գործվածքեղենի վաճառքով զբաղվող ֆիրմաների թիվը 1960 թ. 17 միավորով ավելի էր, քան 1951 թ.։ Առևտրի ոլորտից դուրս գործում էին 30 հայկական ֆիրմաներ ու միավորումներ⁴⁴։

Այլազգի առևտրականների տնտեսական գործունեության բնութագրման համար կարևոր նշանակություն ունի այն փաստը, որ 74 ֆիրմաներ ու միավորումներ (71-ը հայկական, 3-ը այլ ազգային փոքրամասնություններին պատկանող), բացի ներքին առևտրից, կատարում էին արտահանման-ներմուծման գործարքներ⁴⁵։ Ներմուծմամբ ու արտահանմամբ զբաղվող հայկական ֆիրմաների և միավորումների քանակի ավելացման միտումը խոսում է հայ առևտրական շրջանների գործարար ակտիվության զգալի ընդլայնման մասին։

Հայերին պատկանող առևտրական ֆիրմաներից կարելի է առանձնացնել միջիններն ու խոշորները։ Դրանցից են Կ. Խամուլյանինը (տեքստիլի ու պլաստմասսաների ներմուծում և առևտուր), Ջ. Միքայելյանինը (բամբակի արտահանում) և Ս. Գաբրիելյանինը (դեղագործական ապրանքների ներմուծում ու իրացում)։ Կարելի է թվարկել ևս Գրկու տասնյակ անուններ⁴⁶։ Խոսելով համեմատաբար մանր ձեռնարկատերերի մասին, կարելի է նշել, որ Հալեպում գրանցված 9 գրավաճառներից երկուսը հայ էին⁴⁷։ Սիրիայում լուսանկարչական գործը կենտրոնացած էր հայերի ձեռքին։ Նրանց էին պատկանում գրեթե բոլոր լուսանկարչական տաղավարներն ու լաբորատորիաները, ինչպես նաև լուսանկարչական սարքերի խանութները։ 1962 թ. Հալեպում եղած բոլոր 8 լուսանկարչական տաղավարները պատկանում էին հայերին, Դամասկոսում՝ 10-ից 3-ը, Հոմսում, Համայում և Լաթաքիայում՝ մեկական⁴⁸։ Այդ նույն թվականի տվյալներով Հալեպում գործող լուսանկարչական սարքավորումների 6 խանութներից 5-ը պատկանում էին հայերին, Դամասկոս-

³⁹ Quide Arabe..., p. 288.

⁴⁰ Նույն տեղում, էջ 326.

⁴¹ Նույն տեղում, էջ 330—331.

⁴² Նույն տեղում, էջ 351.

⁴³ Նույն տեղում, էջ 330—351.

⁴⁴ Նույն տեղում, էջ 361—374, Alepo. Chambre de commerce..., p. 30—94.

⁴⁵ Նույն տեղում, էջ 38—79.

⁴⁶ العرارات المشتركة ص ٦٠

⁴⁷ Alepo. Chambre de commerce..., p. 31.

⁴⁸ Quide Arabe..., p. 591.

սում՝ 5-ից երկուսը⁴⁹։ Հայերին էին պատկանում նաև օպտիկայի գրեթե բո-
լոր տաղավարները. 1962 թ. Դամասկոսի 6 տաղավարներից 3-ը հայերինն
էր, իսկ Հալեպում հայերին էին պատկանում գործող 4 տաղավարները⁵⁰։
Հալեպում գործող 3 ռեկլամային բյուրոները նույնպես պատկանում էին հա-
յերին, իսկ գրանցից մեկի տերը՝ Հարություն Զիլինկարյանը, ռեկլամի ազ-
գային ծառայության տնօրենն էր⁵¹։ Դամասկոսում 1962 թ. կարի 6 տաղա-
վարներից 3-ի տերերը հայեր էին, իսկ Հալեպում՝ 7-ից մեկը⁵²։ Հայերի գերը
նկատելի էր նաև ոսկերչության բնագավառում։ 1962 թ. Հալեպում
գրանցված 28 ոսկերիչներից 12-ը հայ էին, Դամասկոսում՝ 21-ից եր-
կուսը, Հոմսում՝ 7-ից մեկը, Լաթաքիայում՝ 4-ից մեկը⁵³։ Հալեպի շուրս ծաղկի
խանութներից մեկի տերը նույնպես հայ էր⁵⁴։ Այդ քաղաքում գեղարվեստա-
կան ձուլման բոլոր 3 արհեստանոցները պատկանում էին հայերին⁵⁵։

Հայ ձեռնարկատերերից ոմանք մասնակցում էին սիրիացի ձեռնարկա-
տերերի հետ վստահության վրա հիմնված ընկերությունների ստեղծմանը։
Քանակական առումով հայկական ֆիրմաների մեջ գերակշռում էին անհա-
տական ֆիրմաները, երկրորդ տեղում ընտանեկան ֆիրմաներն էին, երրոր-
դում՝ տարբեր միավորումներն ու ընկերությունները։ Դրանցից էր Ս. Դաբ-
րիելյանին պատկանող խոշորագույն առևտրական ֆիրման, որը ազգայնաց-
վել է 1965 թ.⁵⁶։ 1946 թ. հետո, այն է՝ անկախության տարիներին, սիրիա-
ցիների կողմից ստեղծված առևտրական ակցիոներական ընկերություններին
մասնակցում էին 4 հայ՝ 150 մլն սիրիական ֆունտ ընդհանուր կապիտա-
լով⁵⁷։

Անկախության տարիներին ստեղծված առևտրական ակցիոներական ըն-
կերություններում սիրիացի ձեռնարկատերերը կազմում էին խոշոր ակցիո-
ներների և հիմնադիրների 80 %-ը։ Սակայն քանակային գերազանցություն-
ներից ավելի կարևոր էր այն, որ կապիտալի ծավալով և լուրաքանչյուրին բա-
ժին ընկնող միջին գումարով գերիշխող էր սիրիացիների դրությունը։ Յուրա-
քանչյուր սիրիացու կապիտալը կազմում էր միջին հաշվով 88 հազար սիրիա-
կան ֆունտ, այն դեպքում, երբ արաբական այլ երկրների ձեռնարկատերերից
ամեն մեկին բաժին էր հասնում մոտ 21 հազար սիրիական ֆունտ⁵⁸։ Ըստ
կապիտալի միջին գումարի, հայերը միջանկյալ տեղ էին զբաղեցնում։

Հայերն ընդգրկված էին նաև բանկային-ֆինանսական ոլորտում, որտեղ
նրանց դերը բավականին զգալի էր։ Այսպես, նրանք ստեղծել էին «Բանկ
Լաթաքիան», որի սկզբնական կապիտալը 1 մլն սիրիական ֆունտ էր։ Բան-
կը գրանցված էր որպես ակցիոներական ընկերություն և պատկանում էր
երկու ընտանիքների (Մաքենեջյան և Կարապետ Կիոմեջյան) անդամներին⁵⁹։
Հայ 4 խոշոր ֆինանսիստներ մասնակցել են «Արաբական արևելքի բանկի»
հիմնադրմանը, որի սկզբնական կապիտալը կազմում էր 1 մլն 763 հազար
սիրիական ֆունտ⁶⁰։

⁴⁹ Նույն տեղում։

⁵⁰ Նույն տեղում, էջ 590։

⁵¹ Նույն տեղում, էջ 593։

⁵² Նույն տեղում, էջ 597։

⁵³ Նույն տեղում, էջ 593։

⁵⁴ Նույն տեղում։

⁵⁵ Նույն տեղում։

⁵⁶ القراة الاشتراكية ص ٦٠

⁵⁷ الحريّة الرسمية

⁵⁸ Նույն տեղում։

⁵⁹ الحريّة الرسمية ١٩٥٣ ٦٧

⁶⁰ الحريّة الرسمية ١٩٦٠ ١٨

«Հալեպի առևտրի պալատի տնտեսական տարեգրքում» գրանցված է 25 հայկական ֆիրմա, որոնք իրենց գործունեությունը կապել են տրանսպորտի, շինարարական կապալի և կոմունալ ծառայությունների հետ: Դրանցից կարելի է առանձնացնել խոշորագույն հայ ձեռնարկատեր Զորջ Միքայելյանի ֆիրման⁶¹:

Սիրիական 1655 ձեռնարկատերերի ստեղծած ակցիոներական ընկերություններից 15-ը հայերի մասնակցությամբ էր (0,9 %) ⁶²:

Հայերին էր պատկանում ակցիոներական բոլոր ընկերությունների միայն 1,07 %-ը՝ 2652 հազ. սիրիական ֆունտ ընդհանուր կապիտալով:

Այսպիսով, Սիրիայում հայերը միշտ հանդիսացել են ազգային բուրժուազիայի բաղկացուցիչ մասը: Ինչպես նշում է ամերիկյան հետազոտող Թոմաս Դրինշիլդսը, նրանք «Սիրիա գալուն պես դարձան իրենց ընդունած պետության մեջ գոյություն ունեցող տնտեսական համակարգի անքակտելի օղակը, ենթարկվեցին այդ համակարգին բնորոշ բոլոր սահմանափակումներին»⁶³, Այն հանգամանքը, որ Սիրիայի հայ ձեռնարկատերերը թեև հարուստ, բայց այնուամենայնիվ, ազգային փոքրամասնության ներկայացուցիչներ էին, հսկայական ազդեցություն էր թողնում նրանց գործարար ակտիվության, ինվեստիցիոն քաղաքականության, գործունեության մեթոդների և այլնի վրա: Նրանք անընդհատ պետք է հաշվի առնեին քաղաքական իրադրության փոփոխությունները և հարմարվեին տվյալ պահին տիրապետող ուժերին:

ПОЗИЦИИ АРМЯНСКОЙ ЧАСТИ СИРИЙСКОЙ БУРЖУАЗИИ В ЭКОНОМИКЕ СИРИИ (1945—1960-ые годы)

С. М. МУРАДЯН

Р е з ю м е

Армянская буржуазия в Сирии всегда являлась составной частью национальной буржуазии. В период французского мандата насчитывалось едва ли с десяток армянских семей, принимавших активное участие в деловых операциях. В годы независимости создались наиболее благоприятные условия для инонациональных предпринимателей, хотя армяне, за исключением банка «Латакия», не учредили ни одной сугубо армянской компании. Крупнейшие предприниматели из числа армян вошли в состав учредительных компаний, созданных их сирийскими коллегами. Армянам принадлежали лишь 1,07% всех акционерных компаний с капиталом 2,652 тыс. сир. фунтов.

То обстоятельство, что армянские предприниматели были представителями хотя и богатого, но все-таки национального меньшинства, оказывало огромное влияние на их активность, инвестиционную политику, методы деятельности и т. д. Они всякий раз должны были учитывать изменения в политической ситуации.

⁶¹ Алепо. Chambre du commerce.... p. 200.

⁶² Նույն տեղում:

⁶³ Томас Гриншилдс, Поселение армянских беженцев в Сирии и Ливане: в 1915—1939 г. (Научно-информационный бюллетень АН АрмССР, 1982, с. 14).

THE POSITION OF ARMENIAN PART OF SYRIAN BOURGEOISIE IN THE ECONOMICS OF SYRIA (1945—1960-s.)

S. M. MURADIAN

S u m m a r y

Armenian bourgeoisie in Syria was always the component of national bourgeoisie. During the French mandate there were scarcely some ten Armenian families, who took active part in business operations. During the years of independence the most favourable conditions were created for employers of other nationalities, although Armenians, with the exception of the bank "Latakija", didn't set up any special Armenian company. The biggest employers of Armenian nationality entered the structure of establishing companies, which were created by the Syrian colleagues. Armenians had only 1,07% of all joint-stock companies with the stock of 2,652 thousand of Syrian pounds.

The circumstance, that Armenian employers were the representatives although of the rich, but still of the national minority, exerted a great influence on their activity, investment policy, methods of activity, etc. Every time they had to take into account the changes in the political situation and please ruling forces of the given moment.